



La squadra da La Val perd la ferata de Copa Provincia cuntra le Dietenheim a püc menüc dala fin.

In sabeda ai 12 de novëmber püch do l'inauguraziun dl pulmin nü él gnü sughé la partida de retüda de Copa Provinzia cuntra le avversar da Dietenheim che á ince davagné al'andata por 3-2. La Val tëgn le vantaje cina püch dan la fin.

Al é le Dietenheim che pëia ia cun plö sbunf, le sterch mezciamp fej giré bun le palé sön le ciamp dlacé da Plans. Al é indere i ladins che va in vantaje al 20^a cun Christian Dapoz, en palé rebatü vëgn controlé dal sogadú a mezciamp che fej pié ia na trata sècia cuntra l'incrujiada de porta. Püch do pro Stefan de fa giré le curan sön le pé lunch, le palé rebatü dal numer un rōia ciamó n iade a Max che se presentëia sú dan porta, la trata rōia indere ados al portier. Le atacant avversar á al 40^a l'ocajiun por avalié le resultat, sön trata da ciantun rebat chësc bun de cé por püch dlungia porta ia.

Le pröm tēmp se stlūj insciö jö sön le 1-0 por La Val.

Le secundo tēmp é der combatü, i sogadus ne se vëgn nia sön le ciamp, a fa gní nervusc i patruns de ciasa é le atacant che anüza les svistes dl'arbiter por tizé sö i defensurs. I ladins fej dl düť por se paré dala presciun avversara y a püc menüc dala fin ti sciampa n sogadú amez jö y fej pié ia na trata bassa dlungia le pé de porta ite. Cun chësc gol che fej avalié le resultat se stlūj ince jö la partida. Le Dietenheim passa le rode de Copa Provinzia. Cun chësta ultima partida se stlūj ince jö definitivamēter la sajun da d'altonn por la squadra da La Val.

Formaziun La Val : Julian Moling, Luca Pescollderung, Marco Castlunger, Paolo Vallazza, Egon Frenes, Max Nagler, Christian Dapoz, Stefan Sottara, Felix Nagler, Samuel Winkler, Adrian Miribung

Goi por La Val: Christian Dapoz al 20^